

donner aux pauvres, qui ne soit honneste & bon s'il se peut, autrement ceste offrande est reiettée de Dieu, comme celle de Cain, qui donnoit le pire de son troupeau en sacrifice, où le bon Abel faisoit choix du meilleur, imité à present de plusieurs bonnes dames, & de personnes de merite, qui se priuent souuent des mets les plus delicieux de leur table, pour en faire part || aux 292
pauvres malades & necessiteux, qu'ils enuoyent visiter iusques dans les cachots & où ils sçauent qu'il y a necessité.

Quand quelqu'un de nos Canadiens ou Hurons, veut faire festin à ses amis, il les enuoye inuiter de bonne heure comme l'on faiçt icy, mais personne ne s'excuse là, dont vous en voyez tels, sortir d'un festin pleins comme un œuf, qui du mesme pas s'en vont à un autre, où ils se racheptent s'ils ne peuuent manger, car ils tiendront à affront d'estre esconduits s'il n'y auoit excuse vrayement legitime, & que ce fut un festin à tout manger.

Le monde estant inuité, on met la chaudiere sur le feu, grande ou petite selon la quantité des viandes & le nombre des personnes qui doiuent estre de la feste, tout estant cuit & prest à dresser, on va de rechef faire la seconde semonce, par ces mots Montagnais, comme à la première fois Kinatomigaouin, ie te prie de festin, & s'ils sont plusieurs Kinatomigaouinaou, ie vous prie de festin, lesquels respondent ho, ho, ho, & entr'eux Ninatomigaouinauo, nous sommes priés de festin. Mais les Hurons disent d'un ton plus graue & puissant en inuitant au festin : Saconcheta Saconcheta (qui est un mot qui ne deriue point neantmoins du